

保德州志

卷六至卷七

# 保德州志

縣長萬泉馬蕃庶總裁

郡人

張寶樞  
王贊堯

襄助

郡人張念祖經理

郡人王永明校對

## 官師第六

殷夢高曰天生民而立之君君不能獨理而分疆置吏使司牧之然則官師者承流宣化百里之所寄命者也

尸位素餐已足耻矣若復作威福恣谿壑毋乃國之蠹而民之賊與保德自郡縣以來吏斯州者或任專城或司佐理不知凡幾矣乃按籍稽之前之傳者何寥寥也惟明自成弘而後姓氏類多可紀然彼循良著稱堪垂不朽者又多乎哉計其一時乘權蒞事威勢赫奕固顯榮矣及乎運數遷移腐同草木間有一二敗檢者流

且繼今指摘無窮焉嗟乎前事之不忘後事之師也繼人君子尙其鑒諸作官師志

官制六之一

名宦六之二

職名六之三

憲澤六之四

署官六之五

裁官六之六

雜職六之七

社師六之八

流寓六之九

官制

宋

朝散大夫知保德軍事上騎都尉一員 大中大夫同知保德軍事輕騎都尉一員  
承信校尉充保德軍事判官飛騎尉一員 武德將軍司獄驍騎尉一員 顯武  
將軍都巡檢騎都尉一員 承宣軍使一員 將仕郎都孔目一員 登仕郎知  
法一員 敦信校尉充司候一員 監造孔目官一員 各寨寨官一員 稅課  
司大使一員 儒學主學一員 慶曆中郡縣置學以郡官提學事 崇寧中設  
學長諭直齋長諭各一人小學教諭一人小長一人

金

以刺史主州事皆授大夫或朝散或少中或奉議兼都尉或輕車或上騎封爵皆五  
等或伯或子食邑五百戶賜紫金魚袋宗室則授大將軍食邑七百戶兼設同知  
判官尉孔目等官略仿宋制

元

設知州一員以漢人爲之授奉訓大夫或奉政大夫或奉議大夫兼管都軍奧魯勸  
農事 承事郎達魯花赤二員以蒙古色目人爲之亦兼管諸軍奧魯勸 農事  
同知一員以蒙古色目人爲之授忠翊校尉或授承事郎 判官一員授敦武校  
尉或修武校尉 吏目一員 儒學學正一員至元二十年置經賦學正各一員  
大德四年裁減 稅課司大使一員 芭州鎮巡檢司巡檢一員  
明

設知州一員初授奉訓大夫陞授奉直大夫 同知一員萬曆以後裁 判官一員  
永樂十八年裁 吏目一員 學正一員 訓導三員嘉靖間裁 巡檢一員正  
德間裁 倉大使副使各三員副使萬曆後裁 醫學典科一員 陰陽典術一  
員 僧正司僧正一員 六房司吏六名 典史十三名永樂間裁減止設司吏  
二名典吏六名 舖長司吏一名 承發典吏一名 架閣典吏一名 儒學司  
吏一名 巡檢司司吏一名 保德恆羨廣積三倉各指典一名

國朝

仍明制設知州二員 吏目一員 學正一員無同知判官巡檢訓導裁減司吏初倉大使三員康熙年間并裁保德倉廣積倉兩大使

名宦

宋

高 渙廣陵人熙寧間授朝散大夫知保德軍創建文廟於南坡

舊從祀

金

高懷貞遼陵人大定元年授朝散大夫知保德軍上騎都尉開國子食邑五百戶賜

紫金魚袋改建文廟於城內西北隅

舊從祀

李 晏隴西進士大定二十一年授少中大夫知保德軍輕車都尉開國子食邑五百戶賜紫金魚袋先是軍城西南臨溝輒修輒圮公相視得木瓜崖退數武裁削壁立築城一百七十步有奇城中苦無水於石渠之上累甃爲澗以便汲者創開

西門有記軍治北舊有擬江樓歲久傾圯改而新之名曰安西亦有記政平訟理盜賊屏息人以古治渤海目之

舊從祀

王嘉言明昌間授少中大夫知保德軍甲寅建講堂於文廟之後齋舍俱備

舊從祀

張令臣博平人太和元年授奉議大夫知保德軍提督常平倉事上騎都尉開國子食邑五百戶賜紫金魚袋重修文廟殿宇兩廡垣墉補缺像正值次起講堂齋舍庖厨等類有碑記

舊從祀

元

許仲傑字漢臣長清人至正十三年由毗陵推官以廉能陞知保德州捐俸修州治公廨兼置供奉上司器具及贅砌儒學垣基有碑記

舊從祀

袁公光州人先是至正十三年府谷官軍越境作亂公從遼陽中書叅知政事泊公樞密院判奉武州公樞密院吳公命來撫禦之生者歸死者葬定羌之民始有寧宇越明年樞府推授知州凡有糧儲科役造作重者必躬詣樞府請省減才略

明敏有擔當耆士爲建坊豎碑以記之

舊從祀

明

宋 鎮永樂元年知州事修州治及各廨舍刊太宗文皇帝勅諭揭州所

舊從祀

任 秦陝西咸寧舉人宣德初年知州事廉直無私遇事立決後人推公而敏者必

以公爲首稱

舊從祀

陸 鏞字時鳴直隸崑山進士天順四年知州事雅尙德化不恃刑威民俗丕變歲

旱虔禱大雨隨足陞工部郎中民心感戴思之不忘

舊從祀

騫 璿字廷五陝西永壽舉人成化十七年由靜樂知縣陞知州重修文廟及州衙

三載以才更知代州考滿陞平陽同知

舊從祀

周 山字靜之浙江嶧縣舉人先知山東德州丁內艱弘治十五年知本州立心正大處事公勤治官事如家事以民心爲己心建社訓蒙登堂講學出郊勸農設法備賑修理城池倉場起建譙樓及各公廨神宇禁止邪術佛事並賭博盜賊等類

立集修志本州監生霍升等具呈通政司乞加銜復任

萬曆三十年入祀

王 瓊字廷寶四川成都舉人正德九年知州事律已以廉宅心以愛吏民因責有感悟涕泣者甫四月丁外艱士民不忍別

李 澤字天仁山東歷城舉人由陝西沔縣知忻州正德十年更本州興利除害修廢舉墜政教並行寬猛兼施民心感戴不忍欺正德十三年駕幸山西糧餉多不給部院會舉公於唐家會召買旬日得草十萬束米三百石不擾民而公用足十五年因疾三疏解組巡按張公憐而嘉之送者遮道垂涕

萬曆三十年入祀

藍 雲字子雨錦衣衛舉人嘉靖三十一年知州事長材博學績蘊宏施三溝水渠頽塌幾敗大塲公伐石贄砌有碑記陞本府同知

高岡鳳字鳴治湖廣邵陽舉人嘉靖三十八年自濟南府判知本州心地慈祥政事整肅地鄉遍立社學每朔望必躬爲考校厚賞俊秀作勸民歌迎春歌人咸歌咏之興賢育材民稱真父母時值凶歲開倉賑貸民得生活里甲費煩每至傾產公

積銀於櫃而量其出入盡革宿弊有事於官者惟令自拘至即問理獄無冤滯四十年以前任督糧不及數謝職得報即深衣大帶北面稽首飄然而歸州人泣不忍別有去思碑

萬曆三十年入祀

李春芳號西屏直隸井陘歲貢嘉靖四十二年自大同東路通判陞知州事下車值寇警肅隊戒行北闕城慨然曰孤懸邊城傾圯如是乎相度加幫西南受敵之處更以磚石建樓於上以備不虞關外置暗窖鄉村修堡寨願入城而無房基者給空閑官地以處之又出守城議授之挺身臨城寇不敢近且飭泮宮均田租訊疑獄抑強橫善政種種隆慶元年陞兗州府同知督撫保留本府同知仍管州事後以石州之變調公安撫士民不忍相別

萬曆三十年入祀

劉希準陝西保安舉人萬曆七年以大同府判陞知州事刑清政簡盜息民安五載陞順慶府同知民思之

王甲號劍塘山東利津舉人蕭山名宦進士聘之子萬曆十六年自大同府判陞

知州事以官久代庖事皆頽廢極力振刷遇士大夫必以禮待修水道以全民居起高明倫堂基以興人文士民誦之及寧夏劉噶之變大兵經過人心惶惶草束不敷罔知所措力爲維持草以麥青抵償民賴以安至操履清潔冰蘖可飡飲食衣服歲久如故嘗云已往之日長將來之日短長已能甘短豈難受識者以爲名言云前志稱其實心愛民明決蒞事一塵不染百姓安堵又詩曰林濤百姓笑顏開接得重生父母來重沐一天新雨露掃除千里舊塵埃明如秋夜當空月響似春天震地雷只恐小民留不住飛黃騰踏上京臺皆實錄也五載陞饒州府同知去之日行李一駝送者涕泗嘆服

萬曆三十年入祀

高三聘字希尹山東海寧選貢萬曆二十六年由陝西鳳翔府判陞知州事文學博治政事精勤招擬一揮立就臥治二載有古長者風院道屢旌以親老告歸河曲苗都諫賦詩贈行士民誦而慕之

韓朝貢字邦獻陝西膚施舉人萬曆二十八年自祁縣令陞知州事揮霍長材直心

樸貌如清銷絕軍二百三十二名獨河糧八十餘石州糧改折色徑徵本色磚包城垣一千一百丈大有功於州人四載構疾告歸州人爲立生祠四十年知州胡杓懸扁旌之

胡

杓字棟隆陝西洵陽選貢萬曆三十八年自夏縣令陞知州事仁愛出於至誠

爲善惟日不足除革農民集稅房夫鄉夫軍夫菜戶炭戶磁戶地方柴帚木炭排年迎接彩旗舖行舖墊里老毡條放糧酒席請捐所徭折馬價減鹽稅免耗糧免災糧麥改徵米酌定倉豆出孔設城鄉常平社倉請蠲社倉利谷增養廉倉穀本募義勇修九寨立糧冊給由帖修學宮置學田造祭器請社師明經講學勸課生童設處貢生班銀舉名宦鄉賢節婦爭議渡船整理軍器給囚糧庫役倉役各役緝張工食議里書赤曆緝張等費復令收頭應驛夫以均甘苦美政約四十六款請上豎碑永爲定式後爲知州戴元毀之然盛德至善人不能忘四十四年陞湖廣洵陽同知闔州老幼焚香泣送百里城鄉士民共建生祠四十餘處公請入祀

王國珪福建閩縣舉人知本州事善政頗多崇禎三年邊盜王嘉胤倡亂河曲府谷俱陷屢寇城下公率士民堅守忠肝義胆寢食城頭大聲誓於神前曰國珪棄父母於萬里之遙捐妻子於鋒刃之下寧與城俱碎不與賊共生調兵湊餉賞罰嚴明州人不遭荼毒晉省得固籬藩者公之力也勞瘁身歿柩歸士民哭送百里至今思之 明從祀

陰鶴鳴陝西耀州舉人崇禎末年知本州事闖賊陷陝西府谷縣公率闔學生員日夜城頭誓衆堅守身帶銀錠獎賞壯士時有謀却印陷城者公大罵以折其氣誅其羽翼數人具文請兵會太原等處俱陷力不能支南面再拜焚衣冠而去

### 國朝

安世鼎字鑄九遼東貢生順治七年知本州事叛逆牛化麟拒城公隨營招集鄉民城下之日哭訴將兵者止戮賊魁宥善良入城撫諭民得全活旋遭凶荒請上賑濟撫瘡痍之民無事不周精明仁愛吏胥畏服凡從逆者產例入官屢奉嚴查公

以賊從外遁入搃襲奪民居不宜重累地方力爭得寢陞江西南昌道士庶焚香哭送

孟熊臣字輔昌遼東廕生順治十三年知本州事蒞任五載不携其家嘗輦致貲財爲州公費時去亂離未遠公年幾冠厚重簡默優游坐理天性慈祥不事紛更革除民害八款立石衙前陞福建汀州知府去之日行李蕭然州人泣送至今思之公舉名宦以下知州

明

和 貴陝西石泉歲貢萬曆二十九年授本州同知出納允當廉潔無私屢蒙憲旌軍民悅服三十六年陞濟南審理人爲不平

龔汝懋字德修陝西平利選貢三十七年由蒲州判陞本州同知勤勤懇懇實心愛民一腔忠赤始終不改民稱長者四十一年陞兩淮運判州民泣送不忍別

以上州同

明

陳直字希正山東曹縣監生弘治十五年任吏目贊政公勤人心悅服歷試保德恆羨廣積監政皆能持清廉革宿弊制服撙斗乙丑入覲郡守作謁金門以華其行

張遜山東臨清監生萬曆二十六年任吏目厚重循謹秋毫不浼三載陞去以上吏目  
陳紀字振之陝西盤屋舉人成化十七年任學正學問淵深存心淳厚以葩經教授諸生九載職滿歸途者流涕遮道

宋德隆北直永平歲貢萬曆十七年由兗州府訓陞學正德望端醇無疾言遽色學問淵博尤長吟咏著有過庭編四卷行於世循循善教每以道義爲尙雅不計束修問餽士樂歸之及丁外艱士皆泣送不忍別有從至原籍者數載後音問惓惓不置其子師程登丙戌進士其姻家王遴時爲大司馬殊不形諸辭色人咸服其雅量

任志學字希孔山東曲阜歲貢四十一年由鳳陽訓導陞本州學正雅崇道義恥言

饒遺 陞德府官屬貧不能行上官資之行 以上學正

元

劉章甫至正間以本州學正署州事重修城垣 舊從祀

明

常自修字修德南直來安選貢萬曆三十二年以忻州同知署州事一載民方凋瘵極力撫綏一切煩苛蠲滌殆盡先是本州召買草豆遺蠹甚慘公懇請減免百姓稍甦至季考月課如意作興崇舉耆碩旌表貞節一時士民戴爲眞父母云代之日老幼遮道涕送尋陞保定府判

明

蔡繼榮蕭山歲貢萬曆三十七年以忻州同知署州篆留心民瘼雖爲時未久而興革雅得民心其禁園戶送菜略曰本州清苦百姓憐而送菜此亦良民一時盛舉恐後遂因而爲例非下送上乃上索下矣有餘者取諸蔬圃不足者易於市廛納

者既有往來之苦收者不論需索之擾事雖至微實關政體本州自今以後盡行裁革非沽名非立異心實有不安耳觀此亦足見其操守之一班云

田所賦字獻廷山東進士天啓年以本府照磨署州篆有德政將代郡人赴上呈請乞轉題加銜久任略曰貞操一塵弗染矢志百折不回食糲衣礪茹葷飲冰甫下車而條清算緡不崇朝而立蠲苛稅登陟飭武督課興文禁小販以便窮民置義塚以澤枯骨旌良善懲奸民不尙催科芻牧隨宜講鄉約以化民督保甲以防夜農忭於野旅安於途吏畏其威民懷其德實政實心絕無代庖俗氣善政善教卓有任重鴻材觀此可見其概

以上署官

安承教字居巽鎮西衛百戶先本所人萬曆四十年任本所掌印年方弱冠才實老成除去案衣家伙裁免行戶日用發價購買平等徵收屯軍庫軍首軍解軍舊有陋規墩軍送柴帚旗軍饋遺一切禁革諸蠹悉除纖塵不染所人直碑記之督修城工尤爲勤愼

以上所官